

Huet

I.

De la joie que desir tant
D'Amors qui m'a a soi torné,
Ne puis lessier que je ne chant
Puis que ma dame vient a gré,
En cui j'ai mis cuer et pensé,
A trestote ma vie;
Mes trop me font ennui de lé
Cil cui Deus maleïe.

II.

A tel fes joie sens talant,
Por s'amor, que de mon cuer hé:
Félon, losengier, mesdisant
Dont deable font tel planté
Que trestote lor poësté
Tornent en felonie,
Qu'ainçois sont de mal apensé
Que l'amor soit jehie.

III.

Petit puet lor guerre valoir
Quant ma dame voudra amer,
Et s'ele a talent ne voloir
Du plus loial ami trover
Qui soit, dont me puis je vanter
Qu'a haute honor d'amie
Ne porroit nus amis monter
Por nule seignorie.

IV.

Se longue atente et bon espoir
Ne me font joie recovrer,
Donc m'a Amor traï por voir,
Qui toujours la me fait cuider;
Mes uns vis m'en doit conforter
Qui mainte ame a traïe;
si sai qu'en desesperer
A orgueil et folie.

V.

Bele douce dame, merci
De moi qui onc mes ne fu pris

D'Amors, mais or m'en est ainsi,
Qu'a toz amans m'en aatis:
De cuer vos pri volenteïs
Qu'en vostre compaignie
M'acueilliez, ainz qu'il me soit pis,
De felenesse envie.

VI.

Dame, mout ai petit servi,
A tel don com je vos ai quis;
Mes mes cuers vers vos a plevi
D'estre li plus leaus amis
Dou mont; si le serai toz dis;
Qu'Amor n'ai pas lessie,
Ains est tote en moi, ce m'est vis,
Tant qu'a loial partie.

VII.

Odin pri et mant et devis
Que ceste chanson die
A ceus qu'il savra ententis
D'amer sens tricherie.

- letto 236 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-17>